



Lès orèyes du couchèt

Èrnest BENOIT (Villance)

Ou molin dul Sèri a Viance, i gn'avot in mon.nî ki n'astot nin an rtard pou conter dès carabistouyes û dès flôwes. C'astot sa manière d'aturtunu sès cliyants. Mês, cand i tumot su in parèy a li ki vlot nn-î fé crwâre dès pus grosses ku lès sènes, i rtumot toudi s' sès pates èt c' èst li, souvint, k' avot l' dêrin mot.

Tins dul guère du katörze, i gn'avot dès djins d'après Lîdje k'avint vnu s'instaler ou viadje.

Lu dimatche, al rêchue d' mèsse, lès-oumes papotint dvant l' èglîje. Çu dimatche la, ç' astot ou ké k' avot touwé l' pus bê couchèt. Tins dul guère, lu pus bê astot l' cî k' avot trwâs dèts d' lôrd.

Lu Lîdjwès, ki lès choûtot duspûs in moumint, èt ki n'astot nin a yène non pus, lz-î è còpé la chike a djant :

– *Vos djâzez tant d' vös bês couchèts ! Vous n' savez nin k' après nos-ôtes, i sont co bin pus gros k' an-Ârdène !*

– *Cumint ça, pus gros, di-st-i l' mon.ni ?*

– *A wè, dist-i l' ôte, i sont télmint gros k' il ont dès orèyes come li pwate a grègne vola !*

Lu mon.nî drovot dès oûys come dès ruwes d' bèrwète. Mês i s' ranike ossi vite èt tchandje du convèrsacion.

– *Dj' ê sté al fwâre a Palijû, di-st-i, èt dj' î è vu yôk ku v' n' öz jamwès vû ! I gn'avot in martchand ki vindot dès pêles ossi grandes ku l' rond batch vola !*

Adon, lu Lîdjwès, k' avot tout vû, dit coume ça :

– *Ki volez v' k' on fèye avou dès pêles come ça, ruke t-i.*

– *Ôh, avôrci, dju n'a sét rin, di-st-i l' mon.nî, mês dins vosse pays, ça dot vnu a pont pour cûre lès orèyes du vös couchèts !*